

胡文忠公遺集

胡文忠公遺集卷七

長沙鄭敦謹

湘鄉曾國荃

編輯

陳奏官軍連日獲勝情形疏

六年二月初七日

臣於正月十七日將咸豐五年十二月初一至二十

三日水陸大勝情形繕敘具奏在案十二月二十

七日賊於城外掘挖濠溝樹立木柵湘後營劉騰鴻

帶二哨往偵賊見我兵不多遽出旂來圍我兵且戰

且退以誘之添撥六哨一鼓抄襲殺傷之賊甚多嗣

因雨雪連綿不能出戰羅澤南駐營洪山之南因北

路爲山所隔懼賊乘不意以襲營咸豐六年正月十二日羅澤南移三營駐洪山絕頂距城更近可以俯瞰城中中營駐洪山之首其南岡後營居之以待城賊之來攻左營駐洪山後嶺其南岡右營居之以防後路之抄襲仁營駐洪山中頂其南岡以彪營居之相與聯絡前後其成犄角之勢知賊之必乘夜撲營也十三夜二鼓後鹽運使銜李續賓帶右營往偵將及雙鳳山下賊已率千餘人出城先踞其巔突然相遇李續賓策馬直進鎗礮齊施潛分二支包山之趾而及其脊賊敗羅澤南出中營接應於山之左劉騰

鴻出後營接應於山之右斃賊無數夜半始收隊十
四日黎明天大霧劉騰鴻率後營登雙鳳山巔以劈
山礮轟擊大東門賊莫測我軍之多寡城中大亂四
面開礮以拒及霧收賊以千餘人縋城而下我兵拒
戰甚力賊不能近又於小東門出千餘人來抄我後
羅澤南率中營從雙鳳山北以迎之鏖戰良久賊恃
距城甚近城上可開大礮以轟我師城下木柵又可
爲賊藏身之地我兵奮殺殪其前鋒十餘人賊猶力
戰如故中營乃從湖之乾涸處分二支以繞賊之左
後營驅雙鳳山之賊與小東門賊併聚一處亦分二

支以繞其右皆逼至木柵賊反包於我軍之中城上之礮以賊未入不敢開四路夾擊斃賊約六七百人生擒二十五名城內見賊敗遽出隊數千從漢陽門繞沙湖之尾來救李續賓率右營候補同知蔣益澧率左營都司何紹彩率仁營由小龜山直逼沙湖以鎗礮轟擊斃賊最多諸勇皆分碎其屍擲於城下以示賊此十三夜十四日東路鏖戰之實在情形也十八日賊以百餘人猝抵中路五里墩搗戰我軍知其爲誘按兵不動以百餘勇敢者追至長虹橋賊以千餘人伏於其側我兵退以誘之參將普承堯之寶璽

知府銜唐訓方之訓勇分路進攻游擊張寅恭之恭
勇從九丁銳義之義勇都司周得魁之鳳勇訓導李
景湖之南勇各出四成隊繼之分三路以攻其伏麋
戰二時之久礮斃其頭目三人賊敗乘勝尾擊殺斃
數百人此十八日中路鏖戰之實在情形也二十四
日大雪初霽四更後賊以千餘人來撲中營前隊多
著白衣與積雪同色望之不辨猝抵營前矛傷燒望
火者尾之而至環拋火器噴筒幾登外牆傳籌者守
更者見之奮登牆上擲以大石賊不能登營中之勇
繼出以鎗礮轟擊洪山兩面皆絕壁山脊瘦而積雪

有深三四尺者賊以一路蜂擁而前故我礮所發無不中者賊大敗棄器械走多墜死崖下我兵以夜深不敢追比曉視之雪上皆血跡二十五日四更賊又以大隊來撲中營懲前敗逡巡不敢上黎明始登山拋擲火器羅澤南令中營後哨右哨出洪山之北左哨出洪山之南俟二哨抄出前哨乃開營迎擊劉騰鴻率後營分三路繞賊之後賊遂狂奔其旁遁者多爲我兵所殺直追至城根賊乃踰木柵中由大東門縋城而上我勇登雙鳳山以劈山礮擊之墜城而死者無算乃收隊歸諸勇恨我師出而賊卽退不得多

殺以洩憤乃於二十六日四更中營以右後二哨埋伏於賊來路之左後營以前左二哨埋伏於右五鼓賊以千餘人捲旂而來以撲中營我兵之伏者俟其過而截之中營前左二哨迎之賊方銳意前攻而不知伏者之繞其後前後夾擊共斃賊二百餘人內斃僞總制林姓者一名旅帥之成姓劉姓者二人生擒旅帥李姓者一名皆身懷僞印奪其旗幟有總制旅帥某姓等字樣又生擒二十餘名此二十四五六日賊乘雪夜來攻東路迭獲勝仗之實在情形也二十八日賊以十餘旂由東門而下以十餘旂出小龜山

之尾有渡賽湖燒民房者羅澤南飭劉騰鴻率後營以救火分中營二哨往堵大東門何紹彩率仁勇堵小龜山鏖戰三時斃賊約二十餘人蓋賊欲誘我師至城下可於城上以大礮轟之也羅澤南以賊不多先令中後二營收隊蔣益澧率右營進駐小龜山接應仁營俾得收隊不致爲賊所乘譚賊見三營之勇不多忽於壇角出大股千餘人有戴金龍風帽黃馬褂之賊立馬於小石山巔指揮眾賊從隄上以牽制左營小東門大東門縋城而下者千餘人直撲仁營火箭噴筒鎗礮並施賊氣頗悍仁營分三支應之奮

力抵禦不少退卻左營見兩路齊至飭勇駐小龜山
巔據險以待分二哨繞小龜山而下以截撲仁營之
賊乘勢邀擊賊敗由湖汊逃至城根復頓旂迎戰我
軍中營右營後營分三路奮迅而前與左仁二營相
爲包繞此衝彼突不遺餘力斬斃賊約六七百人餘
賊皆遁走木柵中日暮收隊左營在後徐行賊之在
小石山者忽由隄上尾追左營反旂殺之鎗斃其戴
金龍風帽者此二十八日東路鏖戰之實在情形也
二月初一日賊防我兵進攻城池欲遏賽湖之水以
斷其路以四五百人掘土填橋甕居民驚報羅澤南

飭劉騰鴻率後營臨隄上礮隊居先轟擊賊不能敵
直奔中和門東舊壘冀縋城而上諸勇乘勝尾追作
三路包繞城下溝極深竹簽木椿又極密賊無可遁
之路悉陷於溝坑椿簽中我勇火器環擊鮮有脫者
屍填滿溝其得縋城而上者不過十之一耳東路之
兵方歸賊又以三四千人過鮎魚套橋由八步街對
岸以擊我軍之腰臣飭唐訓方率訓勇普承堯率寶
勇張寅恭率恭勇周得魁率鳳勇過長虹橋迎敵飭
丁銳義率義勇李景湖率南勇由五里墩渡浮橋以
禦八步街之賊賊之在長虹橋者見我兵至施鎗搦

戰我兵按旂不動俟其近前始開鎗礮以轟之賊急分三路來抄我兵亦以三路應我進賊退我住賊來如是者歷二時之久東路見中路鏖戰飭參將葉永泰督彪勇出湖中遙爲接應賊畏抄後敗走各營乘勝追之殺賊數百奪獲黃旂二十餘面生擒十三名賊之由八步街出者南營向前截之眾寡不敵勢幾不支賊愈戰愈眾我兵之戰於長虹橋者懼對岸有失飭善泅水者踰鮎魚套港援之殪斃賊目十餘人奪獲旂幟甚多奪銅礮一尊賊敗走日暮收隊此二月初一日東路中路接戰獲勝之實在情形也初二

日臣軍與羅澤南軍各出數百人誘賊賊亦以千餘人縋城而下我兵爭先奮擊斃賊數十人賊緣隄走我兵乘勝追之殺賊無算奪獲黃旂十餘面銅礮二尊火藥八桶賊敗入城此初二日中路東路復獲勝仗之實在情形也水師現在添備火具趕緊催齊臣卽日定期會勦力圖擴清以慰聖懷所有陣亡

藍翎守備丁懷本藍翎千總金品高藍翎把總黎文祥向德明秦裕昌外委蕭得勝胡萬隆等屢立戰功向先殺賊奮不顧身深堪憫卹丁懷本請照都司例優卹金品高請照守備例優卹黎文祥向德明秦裕

昌請照千總例優卹蕭得勝胡萬隆請照把總例優卹以慰忠魂其有在事出力員弁及陣亡受傷勇日俟臣查明續請獎卹謹將連日接戰大獲勝仗情形會同湖廣總督臣官文署提督鄖陽鎮總兵臣楊載福恭摺具奏

硃批覽奏均悉丁懷本等均照所請優卹該部知道欽此再翰林院侍讀金國均上年請假回籍迎親現已假滿應卽回京供職惟湖北一省釐金牙帖甫經設局籌辦非得本籍廉正紳士經理恐無以通民情而收實濟臣已咨會侍讀金國均並丁憂在籍之前任大

理寺少卿彭久餘前往襄陽安陸鄖陽荊門等處總理局事俾商民及早輸將而吏胥無所欺隱武漢克復後再將紳局移於省會兼可咨訪團練人才以求樸勇之士理合附片陳奏

硃批著照所請欽此

陳奏水陸官軍連日獲勝疏

三月初一日

臣於二月初七日將咸豐五年十二月二十七日至咸豐六年二月初二日陸路迭獲勝仗情形具奏在案二月初三日賊以數百人掘賽湖之隄使我兵不能及城根知縣劉騰鴻督湘勇後營以鎗轟之石

營排列其後以防鷹嘴閣下之伏賊於隄上迎戰我兵分三路抄之殲賊二十餘人賊走乘勝追過鷹嘴閣賊先以千餘人伏於十字街長虹橋下溝內城中之賊見追兵至少忽以大隊分三路而來一出鷹嘴閣以禦官軍一出長虹橋以助暗伏之賊又以一支渡鮎魚套循隄至長虹橋對岸排鎗以待我兵抄至長虹橋賊伏突起放鎗搦矛蜂擁而前隔岸之賊又以礮橫擊我軍右營與鷹嘴閣之賊戰不能往救後營之勇不及賊之什一知縣劉騰鴻誓以死戰用劈山礮及擡鎗轟之賊敗走我兵莫不以一當百計追

殺五六百人蓋劉騰鴻身先倡率之力也適臣中路見長虹橋接戰出兵往援候選從九丁銳義等率義勇先至與後營追至望山門外奪獲旗幟數十面騾馬十四匹而臣中路之寶勇訓勇恭勇鳳勇及東路之中營左營彪營仁營俱以大隊接應殺賊無算賊大敗入城此初三日接戰大獲勝仗之實在情形也賊以屢敗堅閉不出荊州所解礮位運至洪山東路於初四五六七等日令諸營以二礮扛至雙鳳山巔以二礮扛至沙湖尾紫金山巔俯瞰城中對城轟擊僅壞其城樓女牆數處而堅城非礮力之所能破也

初九日督

臣

官文會期大舉

臣

與羅澤南飭各營製

長梯數百並挾土囊負沙袋束稻草以填城下之溝兼以壓覆城根之木椿竹簽又扛大礮於山巔以轟擊其城上之賊備揚塵車以迷賊目中路各營攻城南鷹嘴閣之左右東路各營攻大東門南門之左右復各派五成隊分路而進中路則攻望山門中和門鮎魚套等處東路則攻小東門紫金山沙湖壇角等處派川兵川勇嚴守八步街等處以爲聲援使賊不能並聚一隅以殺其勢初九日四更齊集城下先以刀斧手斫其壕邊之木柵二重繼以土囊稻草填其

城壕方在緣城而賊忽大號守城之賊皆起擲火毬下亂石墜滾木擡鎗鳥鎗紛紛施放其礮臺之大礮皆以大子羣子連環開放我勇之逼城根者受傷最多毫無退志前隊已傷後隊又緣梯而上彼勇陣亡此勇又踰溝而前擡鎗隊皆挺身溝外以轟擊城上之賊亦不以傷亡而稍怯相持一時仰攻之難不如城上俯禦之易終莫能登臣以礮傷士卒太多知縣劉騰鴻衣履頭巾洞穿十數處而身無重傷臣亦恐遂傷之乃令諸勇暫退伏於城下坡壠俟其子藥之盡而復攻忽見城上之礮自裂三座傷賊甚多諸勇

三次乘之而上賊急不能支以桶盛火葯燒擲礮石更密於前終不能上申刻收隊城中之賊逃出者皆言是日城上爲我軍礮斃者以四五百計僞總制陳姓李姓僞國相韋姓楊姓並僞軍帥三名均守城賊目也又因礮裂而自斃者僞十二國宗韋姓一名羅澤南營臣營之受礮傷及中礮陣亡者亦已六百名此初九日兩路力攻七時之久鎗斃多賊之實在情形也臣以攻城多傷暫令休息賊於初十十二及十四十五等日以數百人由大東門縋城而下或繞沙湖而出搖旂擗戰我兵不出則距踴而前我兵甫出

則捲旗而走諸勇或分路圍抄或暗伏掩擊每日斃賊或十餘名或數十名終無益於攻剿之大計惟下游青山窰灣一帶爲陸路接濟賊糧之道擬分數千人駐紮其地而臣營羅澤南營兵力尙非有餘遇回審顧一月有餘終以分兵扼下游爲勝算十七日羅澤南李續賓率湘勇各二哨往窰灣審視營基窰灣距城約十里在沙湖之尾湖水出港中出建石壩一座以通江隄率勇過壩橫列隄上羅澤南李續賓復帶親兵數十人沿江而上以察賊船賊之大隊盡由武勝門而出不下三四萬人排列六七里之遙旂幟

蔽江其前隊八九千人直逼陣前羅澤南以我寡而
賊眾踴壩寬闊必據險而後可戰乃飭勇排陣徐徐
而退退數十丈又頓旗搦戰如是者四五次乃渡壩
排陣於港之左賊亦奮躍而前排列於港之右羅澤
南李續賓身先士卒而密飭鎗礮手百餘人伏港內
低處飭各隊刀矛旗幟皆佯作逃奔狀賊得意迅追
甫至壩我兵鎗礮齊發賊隊整而人密所發皆中應
聲而倒回旂返殺賊大敗適都司何紹彩率勇來援
相與尾追六七里之遙其鎗傷者不能行皆爲我兵
所殺約四百人屍橫隄濱日暮乃收隊當賊以大隊

出武勝門之時先以千餘人駐紫金山千餘人駐雙鳳山蓋防我兵抄隄之後也候補同知蔣益澧率湘勇左營劉騰鴻率湘勇後營駐小龜山以禦紫金山之賊從九羅嘉亮生員劉典率湘勇中營前左兩哨以禦雙鳳山之賊參將葉永泰千總秦國勝率彪勇繼之賊見我兵自窰灣收隊度其路遠不能遽歸乃折而回冀襲我營盡由武勝門城根萃於山下黃旗蔽湖喊聲震谷直撲小龜山而上勢極兇悍蔣益澧督勇禦於山右劉騰鴻禦於山左賊擁而上則轟鎗礮以擊之賊受傷而退刀矛手追至湖濱以黑夜莫

敢深追復據山上以待賊蜂擁而上則又以鎗礮刀
矛擊追之如是者五次賊以小龜山難踰乃出紫金
山之南橫出小東門與大東門之賊會奮躍而上又
爲湘勇中營及彪營所阻自黃昏戰至二更後我兵
以二千餘人禦賊數萬無懈可擊及審濟勇歸悉往
助陣聲勢益壯賊逃入城中比曉往視賊尸填於湖
中及溝外者不下五六百矣此十七日陸路各營接
戰大獲勝仗之實在情形也二十三日賊以數百人
在小龜山延燒民房大東門亦出百餘旂接應羅澤
南乃令中營出二哨以逐小龜山之賊出二哨以禦

大東門之賊小龜山之賊遁眾勇追之駐其山以待而賊之由壇角出者二萬計排列沙湖溝之北悍賊數百人則登紫金山旋循沙湖之隄以鎗礮轟擊我兵以數百人與之相持二時之久羅澤南見賊之多乃自帶親兵督中營二哨先擊追大東門之賊飭知縣劉騰鴻率湘後營都司何紹彩率仁營與湘中營同踞小龜山用劈山礮擊隄上之賊賊退諸勇乘勝追之至沙湖坪以排鎗轟擊復以一隊奮登紫金山共斃賊數十人賊遁歸溝內賊隊之排列溝北者猶整齊如故羅澤南飭諸勇仍踞小龜山令數百人追

隄上之賊殪其先鋒數名逐至紫金山下賊踞山上
放鎗以拒溝內之賊見追兵不多踰溝而前羅澤南
與劉騰鴻督大隊分路應之何紹彩率仁勇由溝外
橫截紫金山之賊賊爲我兵所包遂大亂各營環繞
斃賊六七百人分裂其屍血流湖際餘賊踰溝而逃
我兵亦收隊賊乘我兵之歸復有登紫金山者適候
補同知蔣益澧聞戰率左營接應因奮殺數十人日
暮收隊奪大黃旗四面小旗十餘面生擒七人此二
十三日東路大獲勝仗之實在情形也署提臣楊載
福於二月初五日黎明率水師十營自沌口出隊至

鸚鵡洲正後營喻吉三副前營萬化林副中營李濟
清循東岸而下正右營孫昌凱副右營張榮貴正左
營張啟基副左營陳金鼇正中營鮑超正前營周嘉
元副後營周清元循西岸而下距賊船約四五里之
遙卽排列以待是日北風甚大賊以大拖罟四隻從
鮎魚套拆流而上開礮一次卽轉舵下駛佯作退避
狀蓋欲誘我軍下擊而反攻也各營靜聽軍令毋敢
妄動賊又出鳥船及大拖罟二十餘號順風揚帆魚
貫而進以衝我東岸之船各營仍堅持不動俟賊船
將近楊載福飭卽迎頭擊之鎗礮齊施火器並發賊

船整而密火器所著登時焚烈中礮者紛紛墜水正
右營孫昌凱副右營張榮貴正左營張啟基副左營
陳金鼇正中營鮑超復過江以抄賊尾期併力夾攻
一舉殲滅而賊船之在南岸嘴者見我船多趨東岸
亦出大船數十號緣西岸而上周喜元率正前營周
清元率副後營迎頭截擊衝入賊隊賊船不敢進仍
退泊南岸嘴沙洲之內土牆之下堅伏不動其由鮑
魚套而上者喻吉三萬化林李濟清奮勇以攻其前
孫昌凱張榮貴張啟基陳金鼇鮑超繞出以攻其後
縱橫馳逐鏖戰逾時賊之鳥船較拖皆高大上排立

礮各營合擊燒其大烏船一隻船礮沈江逆賊二百餘人登時焚溺無一得脫者奪大拖罟一隻擒斬焚溺各百餘名奪千觔礮十尊賊遂敗走各營乘勝力追斃賊無算蓋南岸嘴賊船爲正前營副後營所牽綴不能赴援故遂得以盡力擊殺也另有大烏船一隻橫列河畔正後營副前營副中營圍而奪之賊之竄岸墮水者數百人悉爲我軍所殺船大易於擱淺推挽不動遂縱火焚燒仍取其千觔大礮八尊以歸火烈未及盡取而船已沈楊載福以賊船去遠又值日暮遂收隊初六七八等日楊載福飭令十營迭次

出隊賊因大敗之後堅守不出初九日楊載福以陸路各營會期進剿寅刻率十營出隊正後營喻吉三副中營李濟清副前營萬化林田東岸攻鮎魚套之賊正右營孫昌凱副右營張榮貴正左營張啟基副左營陳金鼇正中營鮑超正前營周喜元副後營周清元由西岸攻南岸嘴之賊賊恃其土牆堅固我軍百計誘之仍不出戰惟於牆隙施放鎗礮我以大礮轟擊賊以大礮拒敵士卒莫不憤怒爭先衝突又以火器噴筒射入牆內焚賊船隻斃賊甚多是日南風大起我軍戰船搖蕩不定開礮無準楊載福恐爲賊

所乘令各營徐徐收隊仍紮沌口數日接戰計燒大
鳥船二隻奪大拖罟一隻奪千觔大銅礮十八尊擡
鎗鳥鎗劈山大礮三十餘件黃旂黃帽黃馬褂刀矛
偽文報等多件賊之被轟擊及溺水死者無數生擒
賊目五名訊據賊目偽丞相陳姓已爲我軍所殲該
逆等新從九江安慶帶船上援不料一戰遂敗此水
路迭獲勝仗之實在情形也臣等水陸自冬至春齊
力攻堅八十餘日中幾於無日不戰然堅城未復戰
士之中礮傷者已逾二千餘名勇氣不衰士怒未已
非賊強兵弱蓋攻守之異宜且下游一路水陸皆虛

未得其要也再四商酌陸師自以分兵下游斷賊糧路爲要著本月二十五日鹽運使銜李續賓知縣劉騰鴻率三千人移駐下游窰灣以扼其吭羅澤南仍駐洪山調中路唐訓方八百人以益之臣當中路長虹橋一面尙有四千餘人足敷圍剿至水路賊匪自上年金口大捷之後每遇賊船出隊則我軍奪獲必多遂匿於武漢兩城之下外以沙洲爲護內與陸賊相依官軍逼近伏匿不出計惟有多用火船乘風延燒趁勢追剿或可得手春水方生旬日之內必可尅期大舉聚而殲旃以期上慰聖懷所有水陸陣

亡員弁抓城拔柵踰越重濠焚奪賊舟冒險陷陣忠義勇敢實堪憫惜可否加等議卹以慰忠魂藍翎千總彭本係千總黃錦雲請照守備例優卹藍翎把總譚光福把總蕭登高王運發藍翎儘先外委記名把總李正友請照千總例優卹外委羅龍輔劉瓊茂周勝友谷世泰胡祥發彭有順曾昌熾請照把總例優卹六品軍功哨官瞿宏升羅正富陶鎮南柳定國何連芳郭定陞羅月友於金口武漢案內積功應保請照外委例優卹六品軍功文童周其杏文顯謨江玉梅張紹華龍玉和積功應保請照外委例優卹其餘

在事出力文武員弁及陣亡受傷勇目可否由臣查明彙請獎卹謹將水陸疊次接戰大獲勝仗情形謹會同湖廣總督臣官文署提督鄖陽鎮總兵臣楊載福恭摺由六百里馳奏

硃批覽奏均悉出力文武及陣亡受傷各勇目著查明分別彙請獎卹彭本餘等著照所請優卹該部知道三月十四日奉

再臣於二月二十三日接準兵部侍郎臣曾國藩函開吉安府城失陷江西省軍事日形糜爛急調羅澤南李續賓提師回援等語臣思首逆石達開擾害江西

與粵東流匪合併頓益悍賊四五萬人而本境之匪
附益更多既已連陷江西州縣則南贛撫建固屬可
危浙閩湖南尤深遠慮東南大局所關臣何敢以鄂
中一省之事而翫然不顧且近年以來各省招致兵
勇多不可恃自非羅澤南等速援未易勦辦也羅澤
南之議則曰武漢爲南北樞紐視他省關繫獨大上
綽荆襄下控吳皖未可棄而不顧臣再四思維南岸
各軍力攻八十餘日戰士良苦功隳垂成遽行撤調
則亦不足以激揚士氣且羅澤南之軍正月二月餉
項虧欠江西庫帑亦竭卽令刻日速援而欠餉行糧

必應速爲籌措

臣

之水師火具已齊湖南大礮已到

默計旬日之內春汛初起漢陽南岸嘴之沙渚可期

漲溢則賊舟難於閉藏水賊或可燒而走也

臣

等定

計力圖克復如旬日無成則鄂省戰守惟

臣

無可諉

責自當權其緩急籌措餉項先以數千赴援再查羅

澤南李續賓所統勇丁不過五千人到鄂以來與

臣

密商添益三千餘人兵力稍厚羅澤南之招勇擇將

向不冒濫惟軍餉每月需四萬三千餘兩水師十營

月需二萬三千兩前經部議飭撥尙未報解可否

敕下部

臣

破格專籌軍餉指定撥濟羅澤南及水

師十營由臣轉運其臣陸營所需亦應另行設法不得擅支則此軍可期常勝必可委任而責其成功倘卽時克復追勦尤貴神速不致停兵待餉以誤事機萬一久頓城下自不能不先行分援卽須酌付口糧免其中途遲回致使賊計日逞實於大計有所裨益愚昧之見謹附片陳奏

硃批所籌甚是至所請專濟羅澤南軍餉著戶部速議籌撥

上諭會國藩文俊奏吉安失陷石逆久踞臨江南則窺伺贛州南安北則踞守武甯新昌賊勢蔓延全省幾徧周

鳳山陸軍近日又遭挫折請飭羅澤南迅速移師來江
援剿本日復據胡林翼奏現在春汛初起賊舟難於閉
藏已定計力圖克復倘一時未能得手先以數千人赴
援等語所籌甚是胡林翼如能於旬日之間攻克武漢
則羅澤南一軍即可回援江西倘克復尙需時日先行
派兵分援亦須仍由羅澤南等統帶前往方能得力該
督等務當權其緩急不可稍存畛域之見致誤事機將
此由六百里諭令知之欽此 三月十四日同督部奉軍

機字寄

上諭前因會國藩等請飭羅澤南回軍援救江西並胡林

翼奏請暫留羅澤南俟旬日以後再行派兵赴援當經諭令官文胡林翼斟酌緩急辦理現據廉兆綸馳奏江西自吉安失守後賊復於二月二十三等日連陷撫州進賢東鄉安仁各郡縣省城四面受敵消息不通請速撥官兵援救並據何桂清奏報江西省城探聞現已被圍等語江西壤地毗連六省形勢極關緊要現在逆勢披猖省城危急設有疏虞則東南大局豈堪設想此時籌撥援兵計惟羅澤南一軍馳赴省垣庶危城可保著官文胡林翼酌量情形如武漢賊勢實已窮蹙卽照胡林翼前請先派官兵數千名馳援江西令羅澤南暫緩

起程以免功敗垂成若武昌急難克復則羅澤南雖畱
無益而江西省垣十分喫緊卽著官文等飭令該員統
帶原有兵勇剋日起程回援江省並設法迅速馳赴南
昌毋稍遲緩致誤軍機勇目詹起倫施紹恆等所帶各
勇如此時正資攻勦則仍畱該大臣軍營調遣倘不能
得力卽著官文飭令詹起倫等將所有義勇統帶前往
河南交英桂軍營聽候差遣將此由六百里諭令知之
三月二十二日同督部奉軍機字寄

上諭前有旨諭令官文等將勇目詹起倫施紹恆等所帶
各勇酌量飭赴河南交英桂軍營聽候差遣本日據英

桂奏稱已詢知西陵阿此項義勇現存不過五六百名
日久懈生不如從前奮勇設與兵勇不和則轉多周折
若另成一隊則爲數無多等語所奏自係實在情形此
項義勇著仍畱於該大臣軍營調遣毋庸令其前往河
南並著該大臣等妥爲駕馭隨時彈壓至武昌迭經大
兵圍攻久未能下漢陽閒亦報有勝仗尤屬敷衍塞責
該大臣等總統全師身膺疆寄若頓兵堅城老師糜餉
日復一日伊於胡底著官文胡林翼激勵將士督飭水
陸諸軍將武漢兩城剋期收復毋得再有遷延致干咎
戾將此由六百里諭令知之欽此 四月二十二日同督

邵奉軍機字寄

胡文忠公遺集卷七終

胡文忠公遺集卷八

長沙鄭敦謹

編輯

湘鄉曾國荃

官軍大勝並破新壘三座疏 六年三月十四日

臣於三月初一日將官軍迭獲勝仗並分兵下扼窰灣情形馳奏在案二月二十五日鹽運使銜安慶府知府李續賓率同候選知縣劉騰鴻等移營窰灣其地下距青山十五里上距梁山十二里南距塘角十五里可扼下游之險要而斷賊接濟二十六日李續賓率右營劉騰鴻率後營趙克彰率奇字右營李

續燾率副右營各以六成隊由廣興洲進攻塘角該處屋宇鱗次牆垣至堅自洲至於城下十里舊爲市廛最易藏奸李續賓固料其必有伏賊戒飭軍士嚴陣徐行該逆果以數千人伏於草埠隄上民房暗施鎗礮以擊我軍李續賓當卽分兵爲三路趙克彰以奇字右營循隄外江岸空闊處以入劉騰鴻以後營循隄內湖壩以入而自以右營由隄中路以入火器初舉先將茅屋焚燒數處漸漸逼近煙焰彌漫所燒之屋堆積賊糧雜物頗多伏賊旣不能久匿而不起而城中之賊復出五六千人冒煙衝突我兵三路夾

攻鎗礮輪流轟擊刀矛繼之縱橫出入伏賊因火烈而自亂城中援賊氣奪官軍因而乘之賊大敗追殺十里斃賊無算燒燬賊下兩座賊預分數千人踞小龜山故作繞湖後來襲之狀而實欲阻絕洪山東路之師使不得與密灣一軍會合布政使銜甯紹台道羅澤南率中營副中營同知蔣益澧率左營都司何紹彩率仁營由東門直攻小龜山之賊知府銜唐訓方率訓營循城下至山尾以橫截之賊大敗計斃賊六七百人內有黃衣賊目五人奪獲左十一軍正典糧偽印一顆大黃旗十二面小黃旗三十四面刀矛

二百餘件此二十六日分兵之始大獲勝仗之實在情形也二十八日臣之中路洪山東路密灣北路約會齊攻賊以二十六日之大敗堅閉不出惟於城上施放鎗礮以死拒守賊見我兵之分駐密灣也往來之接濟陸路已斷而九江黃州援賊由江上溯又益興治之匪三月初二日洞開城門一由望山門出二三千人循江隄而上以牽綴石嘴之川兵以三四千人由入步街潛行冀襲臣營之後以三四千人由長虹橋衝臣營之前臣於先期已派周得魁等二千人迎礮位於石嘴舟次而賊忽大出當飭普承堯率寶

營丁銳義率義營以擊長虹橋之賊兵少賊多普承
堯等首先衝突十餘次士卒爭先用命勇敢百倍張
寅恭率恭營鄒漢章率副左寶營以禦八步衝之賊
正在酣戰而周得魁等迎破之師聞警回援迎頭截
殺內湖通餉之舢板八哨復於湖畔橫擊其腰犇斃
騎馬黃衣賊目五人賊眾驚駭陸勇乘勢追剿殪五
百餘人賊一支敗而三支俱敗其撲臣中路者皆遁
入城賊同時由武勝門忠孝門出者以四五百人踞
小龜山三四千人踞紫金山復以小支千餘人踞雙
鳳山又由鷹嘴閣出三四千人以襲訓營其賓陽門

虛掩而寂若無聲則賊意之所專注也羅澤南軍駐
洪山當派蔣益澧之左營擊小龜山之賊而以唐訓
方之四哨益之派仁營何紹彩擊紫金山之賊派彪
營葉永泰秦國勝擊鷹嘴閣之賊而羅澤南中營盡
布於洪山左右以防賓陽門之賊蔣益澧唐訓方直
撲小龜山賊陣已卻遂分二哨左右抄出賊眾三敗
三起斬殺衝鋒賊目十餘人賊大潰併力衝殺追斬
屍橫遍地仁營何紹彩以數百人戰於紫金山之巔
賊四面圍繞何紹彩殊死戰不少卻鎗礮已熱則以
刀矛接戰撥刺有聲歷一時許賊勢大敗而賓陽門

忽出城約萬人橫亘其中既以救援敗賊且意洪山之兵力遠在小龜山及紫金山欲乘機直撲洪山大營也羅澤南卽率中營副中營自洪山馳下何紹彩唐訓方由後奮擊殺賊數百人賊眾大潰爭門而入羅澤南卽乘勝窮追賊已大半入城意欲尾之而入賊急下閘板餘城閉於城外者盡爲我勇所殲約五六百人而城上鎗礮密如雨點羅澤南立馬城門左額中鎗子血流被面衣帶均溼然猶駐馬一時許強立不移賊亦不敢再出其何紹彩唐訓方自下面兜剿而上我軍旣已大勝而東南面賽湖隄之賊已近

營壘恐葉永泰一營不支復乘勢速援生擒黃衣賊
日並奪其馬殺賊二百餘人而賊之大股分撲洪山
者又大敗是日賊計專注於東路蓄勢後出雖羅澤
南以薄城帶傷而全軍之獲勝則都司何紹彩直隸
州知州唐訓方等血戰之力也記名道安慶府知府
李續賓與劉騰鴻分駐密灣者僅三千人隊伍嚴整
賊所深畏是日料知賊力必聚於東路遂以六成隊
駐營待賊之至以四成隊分飭劉騰鴻援洪山何紹
彩唐訓方等乃得以專意直前其賊之出漢陽門者
多伏於塘角廢垣之內而水賊之在下游者亦循江

而上犯李續賓按兵審勢俟賊逼近仍分其千餘人爲三路賊見其少齊力攻撲我軍突起擊之鎗礮齊施左擊陸賊右擊水賊之登岸者中路並進追奔十里直抵城壕以少擊眾勇力百倍實冠全軍而賊之下犯北路以攻窰灣營壘者遂大敗通計各路殺賊約二千人黃衣賊目十餘名賊馬賊械旂幟約百餘件生擒長髮老賊五十餘人此初二日三路大勝之實在情形也臣卽日親往洪山看視羅澤南之傷猶能駐坐營外指畫戰狀兼以師老餉匱賊匪堅閉已久有機可乘急欲斬關直入破武漢以速援江西不

期爲守城之賊所傷甚重臣爲延醫診視旋即駐其營中傷深二寸子入腦不出至初八日巳刻因傷身故除詳悉情形另片奏請恩旨外臣查洪山各

軍無所統屬遂於初八日寅刻預撤鹽運使銜記名道安慶府知府李續賓由審灣仍回洪山總領其軍事李續賓廉明愛士至誠感人始事以來無役不從戰功最盛也初九日臣將布政司銜浙江甯紹台道羅澤南之靈輓送至石嘴舟次而數日之內賊卽於城外保安門添築新壘三大座高幾及城掘濠六重寬深各三丈大礮飛子已墮臣營以阻臣進兵之路

臣典李續賓密計及其初成尙可以全力破之遂於
初十日寅刻派鳳營周得魁寶營普承堯訓營唐訓
方分三路以圍攻其前飭各營挾梯以登其壘挾大
木以渡濠兼備鋤鍬以平毀之而以義營丁銳義接
應派恭營張寅恭副左寶營鄒漢章福營李景湖渡
浮橋循港外至八步街隔河轟擊以襲其後復檄川
兵之在石嘴者及新募安勇三百六十人遙爲接應
李續賓以謂合力攻此三壘一鼓而登尙非難事惟
平毀之時逼近城下所傷士卒必多須分營替代乃
可一律平毀而不虞大股之我乘遂派彪營葉永泰

奇字營趙克彰以杜鴈嘴閣之賊仁營何紹彩左營
蔣益澧循襄湖會剿五鼓齊力攻破三壘壘中守賊
各百餘人聚而殲之無得脫者奪獲器械無算並獲
鐵礮十一尊擄鎗三十餘件黎明以後城中之賊分
路大出我軍卽於城濠之外整隊以逼賊而各以百
餘人毀平其壕壘更番迭戰效首虜於臣前者以千
計奪獲大黃旗五十餘面各營士卒亦傷亡二百餘
人而無一退怯者自寅至午鏖戰五時賊勢大挫而
新砌之壘及長壕六道均已毀平李續賓恐軍士之
久戰而懈也復派右營三百人劉騰鴻之三百人會

合助力而兩路之賊乃敗入城竄此初十日破敵斬
築之三壘殺賊大勝之實在情形也都司周得魁奮
薄城下欲率眾緣梯而登被賊礮轟擊不能前周得
魁腦中礮傷現已延醫調治其藍翎外委陳達清外
委曾玉蘭記名外委唐訓得力戰陣亡文童鍾近衡
鍾楚池王嶽峯係羅澤南之門人慕義從軍以助其
師同時陣亡實屬激於公義外委陳達清曾玉蘭唐
訓得應請照祀總例優卹文童鍾近衡鍾楚池王嶽
峯應請照從九例優卹其餘陣亡勇丁容查明咨部
請卹再查上年十一月克復咸甯山坡金口及武昌

城下力戰各案均聲明彙案保舉並蒙

恩旨準

行尙未出奏可否徵至三月初十日并作一案將在
事微員勇目先行獎勵以作士氣出自

皇上天

恩

再查布政使銜浙江甯紹台道羅澤南以諸生講學
宗法程朱其所著小學韻語西銘講義周易附說方
輿要覽諸書體用兼備洵堪輔翼名教咸豐二年賊
犯長沙卽日倡率生徒辦理湘鄉團練忠義至性感
動鄉里遂率其鄉人轉戰湖南江西湖北克城二十
大小二百餘戰均經奏明在案羅澤南每言首逆踞

金陵則武漢爲必爭之地南北樞紐以武漢爲最要
自上年圍剿以來力攻九十餘日督催至嚴雖水陸
勇弁中傷已逾三千人而忠毅之氣不容少懈初二
日帶傷甚重血沾衣帶均涇指畫戰狀以未能尾賊
入城爲恨且言武漢自古用武地賊必死守不力戰
恐荆襄岳鼎均無乾淨土矣初六初七日臣駐其營
中見其神散氣喘汗出如洗臣爲痛哭羅澤南握臣
手言危急時站得定才算有用之學今武漢未克江
西復危力薄兵單不能兩顧死何足惜事未了耳其
與李續賓好爲撐持言未畢而目瞑蓋其心術學術

不愧名儒故臨危不亂言不及私而臨陣勇敢馭兵
嚴明猶其餘事該員之父羅嘉旦年八十一歲長子
羅兆作次子羅兆升讀書應童試其身後事宜由臣
妥爲經理委員護送回籍合無仰懇 皇上天恩
照二品陣亡例加等 賜卹出自 逾格鴻施

該員功績最著并請於湖北江西設立專祠其湖南
湘鄉縣本籍自侍郎臣曾國藩倡義以來臨陣捐軀
之士最多現經本籍紳耆擬請建祠入祀應請卽爲
羅澤南設本籍專祠以士民弁勇附入祠內以妥忠
魂謹將該員歷著戰績開單恭呈 御覽理合附

片陳 奏

羅澤南於咸豐二年賊圍長沙在籍倡辦團練三年帶領練勇勦辦湖南桂東縣土匪是年帶勇救援江西省城旋即馳赴吉安克復安福泰和兩縣城十二月克復湖南永興縣城四年七月克復岳州府城並破城外賊壘復追剿至臨湘縣之長安驛湖北蒲圻縣之羊樓峒崇陽縣之虎爪石桂口等處大獲勝仗克復崇陽咸甯兩縣城至橫溝橋官步橋兩獲勝仗至湖北省城外花園被賊壘三座復破八步街鮎魚套兩處賊壘克復湖北省城

九月追賊至大冶縣之沅埠頭獲勝克復興國州城追賊至田家鎮半壁山三戰大勝又追賊至栗木橋雙城驛兩處大勝克復廣濟黃梅兩縣城追賊至濯港孔隴兩次大勝追賊至九江府城外圍勦並攻湖口縣之梅家洲大小十餘仗五年奉調勦辦江西賊匪克復弋陽縣廣信府兩城收復興安德興浮梁三城攻勦義甯州之三都梁口大勝攻勦碁盤嶺大勝克復義甯州城赴援湖北克復通城縣城進勦桂口大勝克復崇陽縣城搜勦崇陽之濠頭堡及蒲圻之羊樓峒三次大勝克復蒲

圻減甯兩縣城進至山坡大勝駐紮湖北省城東門外之洪山大小七八十仗均勝總計帶勇攻剿以來克復二十城大小二百餘戰合併聲明

上諭胡林翼奏武昌剿賊獲勝破賊新壘三座一摺著胡林翼督飭李續賓等激勵諸軍乘勝力圖克復堅城盡殲醜類外委陳達清曾玉蘭記名外委唐訓得文童鍾近衡鍾楚池王嶽峯均屬同時力戰陣亡陳達清曾玉蘭唐訓得均著照把總例從優議卹鍾近衡鍾楚池王嶽峯均著照從九品例從優議卹此次出力員弁兵勇併準其彙案保奏候朕施恩三月二十六日接奉

上諭胡林翼奏道員力戰受傷殞命懇恩加等賜卹等語
布政使銜浙江甯紹台道羅澤南以在籍生員倡率生
徒辦理團練嗣因楚省賊氛猖獗率其鄉人自效戎行
轉戰湖南江西湖北等省大小二百餘戰克城二十朕
嘉其忠義奮發屢著偉績由訓導超擢道員加布政使
銜方冀其攻復武漢殄滅賊氛克膺懋賞茲因攻勦武
昌乘勝追賊直逼城下受傷殞命覽奏之餘深堪憫惻
羅澤南著加恩照巡撫陣亡例賜卹伊父羅嘉旦著賞
加頭品頂戴伊子羅兆作羅兆升均著賞給舉人一體
會試以示朕褒恤蓋臣至意並著於湖南本籍及湖北

江西地方建立專祠其湘鄉縣士民弁勇打仗陣亡者著一併附入羅澤南本籍專祠以慰忠魂該部知道三月二十六日接奉

密陳南岸賊情並籌議現在情形疏 三月十七

日

臣於三月十四日接奉三月初八日 上諭曾國

藩文俊奏吉安失陷石逆久踞臨江南則窺伺贛州南安北則踞守武甯新昌賊勢蔓延全省幾徧周鳳山陸軍近日又遭挫折請飭羅澤南迅速移師來江接剿本日復據胡林翼奏現在春汛初起賊舟難於

閉藏已定計力圖克復儻一時未能得手先以數千人赴援等語所籌甚是胡林翼如能於旬日之間攻克武漢則羅澤南一軍即可回援江西儻克復尙需時日先行派兵分援亦須仍由羅澤南等統帶前往方能得力該督等務當權其緩急不可稍存畛域之見致誤事機將此由六百里諭令知之欽此同日奉

硃批所籌甚是至所請專濟羅澤南軍餉著戶部速議籌撥欽此仰見、聖謨廣運欽感難名臣思上年河北肅清之後賊勢已挫惟首逆石達開於上年秋閒以老賊二萬餘人由湖北入江西又益以

粵賊四五萬人賊勢漸熾蓋前此脅民爲賊心不願戰而自去冬以後新附之賊甘心從逆其本境土匪附賊者尤不可勝計二月十六日周鳳山以三千七百人全軍失利是卽眾寡不敵之明驗似非重兵猛將奮威埽蕩正恐南服數省岌岌不支可慮者不僅江西一省也湖南選派五千人由東路赴援而江西西路州縣淪陷俱有大股賊匪阻截援軍勢非節節搜剿不能前進湖南撫臣駱秉章擬請 敕閩浙廣東三省各出銳師先保江西完善之區自是善策至侍郎臣曾國藩前次急調羅澤南回援是尙未悉羅

澤南陣亡之事現在水長僅五六尺春汛初起當可望其速漲羅澤南自帶之一千六百人新失所主必須慎選將弁派令專管以歸李續賓統帶臣等前議分軍數千人往援此時羅澤南身故無將可分情形固已不同且剿辦大股賊匪非三四千人所能照應而自會國藩撤調南康青山水陸回援江西省城下游賊援接踵上竄武昌臣所轄武昌邊境盡與江西州縣毗連賊勢滋蔓道途梗塞援軍深入必須多攜軍火錢糧乃免匱乏臣等再四思維惟有水陸力攻決期進剿如卽時克復誠爲善計萬一久頓城下卽

以李續賓等全軍往援方爲妥善至李續賓正月二
月三月欠餉行糧臣當於部議速撥項下一俟到境
卽先專濟該營以利進征並期於陸續轉運無誤要
需所有遵奉諭旨謹就現在情形籌議緣由會
同督臣官文署提臣楊載福恭摺由驛六百里馳
奏伏祈 皇上聖鑒訓示

上諭胡林翼奏密陳南岸賊情並籌議援剿江西情形一
摺江西自臨江瑞州袁州吉安失守後復連陷撫州建
昌等府城並進賢豐城東鄉安仁等縣情形萬分喫緊
本日據胡林翼奏羅澤南現已陣亡武漢如能迅速克

復卽可派兵回援萬一久頓城下卽令李續賓一軍前往等語李續賓著畱於湖北俟武昌克復後再行帶兵回援江西惟該大臣等節次奏報總以克復在卽爲詞朕心實深殷盼若徒以粉飾之詞遷延時日是武漢旣不能克復而江省復不能回援糜餉老師豈非兩失著官文胡林翼督飭水陸諸軍將武漢剋期收復毋得再有遷延致滋貽誤所稱李續賓軍餉一節已據戶部撥解矣將此由六百里諭令知之

四月初一日同督部奉

軍機字寄

再查三月初十日

臣

營都司周得魁力破附城賊壘

爲城上礮傷中腦十四日因傷身故該都司舊隸前
提督塔齊布標下隨臣二年身經百戰勇敢嘗爲軍
鋒克復咸甯山坡力攻武昌戰功尤著應請追贈游
擊照游擊例優卹以慰忠魂

謹按此片於四月初一日接奉

旨準

再上年戶部議覆臣奏請部頒牙帖勸諭助餉一摺
並部議章程十八條摘要刊入牙帖奉旨依議

欽此行文頒發到臣竊查部議較舊例益爲詳密自
應遵照辦理惟臣前奏係因軍需萬緊設此濟急之

法今既示諭數月尙皆裹足不前緣各地方多係迭經兵燹之餘於部議有必應量爲變通者數條若拘泥辦理則商民懷疑觀望甚至藉口歇業無補實濟臣愚以爲慮事之初固貴至密而取民之制總期易行現當攻勦喫緊需餉孔殷何敢稍避嫌怨惟必須因地制宜不得不就現在情形切實瀆陳懇求

聖明洞鑒俯念水陸各軍待餉至急準臣於單開推廣部議各條隨時確查變通核辦凡接充添設改則移埠等項總以此次收捐體查情形填給部帖爲斷並期限軍務告竣之後不準添改以示限制至加增

奏摺解帖本嚴禁需索及申明舊例各條均遵照
部議辦理如蒙 俞允 臣卽將此次所奉 諭

旨敬謹刊刻粘連部帖鈐印頒給以廣招徠而資接
濟 臣爲急籌軍餉因地制宜起見除一面趕緊招商
變通試辦外謹繕具清單附片奏 聞

一舊例額設各行繁盛偏僻各分三則自省城三
陷文案雖稽各行原帖亦多遺失難期悉符舊章
卽如漢鎮昔稱最盛今則蕩爲瓦礫驟難復原又
道途梗塞商賈繞道販運各市鎮貨物衰旺情形
亦彼此今昔不同所有填註分則應請以此次體

察地方實在情形爲斷

一新章擬令上則捐銀一千兩中則七百兩下則五百兩次下三百兩現當軍餉缺乏固宜以多爲貴惟湖北除漢鎮既燬其餘各處集鎮繁盛爲少偏僻爲多至各偏僻下行有歲取行用錢僅數十千者既難照則捐輸亦未便勒令歇業且究係例外急公報效其捐數應請酌定爲制錢一千串七百串五百串三百串二百串一百串共六等按照繁盛上行偏僻上行繁盛中行偏僻中行繁盛下行偏僻下行分別填註

一向例新開集場方準添設現查勘北地方有未被蹂躪者商販匯聚貿易更盛往昔有已被蹂躪者額牙遠避舊帖遠難裁汰市鎮俱已改觀卽與新開集場無異若不準其添設轉於商民不便應請無庸限額舊埠新集均準隨時捐給

一舊額牙帖各有定處惟商民流離轉徙除人帖現無下落外亦有原人執存原帖而原處尙未安集欲於他處圖復舊業者未便阻其生計致令向隅應請酌捐更換準其移埠

一新章內開各市鎮原有舊帖之商擬令壹律更

換準其減半交納並出該撫飭查先行奏明斟酌辦理臣查湖北迭經兵燹原帖自多遺失除原係府廳州縣私給者不準換給外如原帖報部有案自應分別有無遺失辦理其存有舊帖之商果係原人原地擬請依新則錢數三分之一交納一律更換以示體恤其舊帖遺失者應令呈明原帖姓名藉貫鎮市年月減半交納一面補給新帖一面咨部查核查有捏報蒙混各情分別究辦其由舊帖移埠開設者照全數減二成捐換由舊帖改業別行不移埠者照新改之行全數減四成捐換以

示區別

一向來各牙父子兄弟叔姪承充納稅例無不準
明文亦無納資捐充之例今既創爲捐資請帖自
應許其作爲世業以示鼓勵擬請自此次捐給新
帖之後除犯有把持行市私充朋充等情照例嚴
辦外其年老事故親兄弟子姪呈請承充完稅者
免其重捐以示體恤

硃批戶部速議具奏單併發欽此 三月二十四日奉

乞暫畱升任道員襄辦軍務糧臺疏 四月初八

日

臣於三月二十四日接準吏部咨開咸豐六年三月初九日內閣奉 上諭兩淮鹽運使員缺著羅遵

殿補授欽此查羅遵殿係現任安襄鄖荆道襄郡界連豫省爲七省要區該道久任斯缺深得民心軍興以來辦理團防勸捐各事宜兼辦糧臺支放廉正樸實最爲可靠復查該升道已七年俸滿應令給咨赴部引 見經前督臣 楊需於咸豐四年 奏準展

限暫畱本任並準吏部咨覆各在案現值軍務喫緊該道經管之團防捐輸釐金牙帖各事宜頭緒繁多均關緊要可否仰懇 天恩俯準暫畱楚北並請

俟新任道員到任交卸仍候軍務告竣再行給咨北
上臣與督臣官文往返函商意見相同謹會同督臣

官文恭摺具奏

再查湖北地方連年被賊淪陷吏治廢弛貪縱不職
臣訪察聲名貪鄙之員迭次專摺特參並請從重提
審均蒙 恩旨俞允惟貪墨之吏不可姑容而清

正之員自當旌別查升任運司羅遵殿久任安襄鄖
荆道缺廉正誠懇素得士民心力當賊氛四逼之時
獨能力保危疆不致侵軼其所益於全局者甚大該
員前經兼署藩臬兩司悃幅無華實心任事清風亮

節眾望允孚實爲鄂省不可多得之員又荆宜施道莊受祺署荊州同知補用知府鄭蘭試辦川鹽稅務事屬創始利之所在弊所叢生該道府等綜理精密人不能欺清正無私自奉至潔故能月濟荊州駐防兵餉並協濟武漢軍需爲守兼優可稱良吏以上三員堪以表率屬寮風感貪鄙臣既確有所聞不敢壅蔽再查各省例限年終密具司道以下各官考語臣因軍務喫緊訪察難周恐循習虛文未能切實應請俟軍務事竣再行照例舉行合併聲明謹將所知三員據實附片密陳

謹按此疏於五月十二日接奉

旨準

乞展限查辦咸豐三四五等年各屬被賊滋擾
及水旱歉收蠲緩錢漕並年例應辦事件疏
四月初八日

竊查湖北省垣節被賊陷州縣多遭蹂躪兼之水旱
偏災收成歉薄所有歷年錢漕蠲緩徵解應行分別
查辦曾經前督撫臣將咸豐二年被賊滋擾之江夏
等一十六州縣應徵錢漕各款奏奉

恩旨分別

蠲緩其三年被水被旱應行展緩錢漕銀米各州縣

亦值防剿事緊驟難履畝勘報彙辦又經附片奏請
展緩俟楚境肅清再限兩月查辦欽奉 諭旨允

準均在案茲據湖北布政使馬秀儒詳稱查咸豐三
四五等年各屬錢漕銀米等款除黃岡黃安蘄水羅
田沔陽黃陂孝感七州縣之四年應徵及三年以前
民欠未完各款經前督查明該七州縣紳民出力奏
奉 恩旨全行蠲免外其黃岡七州縣之五年錢

漕及江夏等州縣衛之三四五等年歷遭賊擾兼因
水旱歉收應行查辦蠲緩各款雖現有甫經收復尙
在詳查勘辦者亦有仍被賊踞未能勘辦者頭緒紛

繁清查不易且省城厯次失陷文案被燬不全更難
於到任之初卽能清查無遺應請 奏明展俟全楚
肅清再行勒限辦理至湖北年例應辦一切事件亦
均因軍需喫緊無案稽查難於循例辦理並請一併
附 奏展緩等情前來 臣 覆覈無異除咨各部查照
外理合會同湖廣總督 臣 官文恭摺具 奏

奏陳湖北糧道厯年曠廢情形乞

敕部抄

發檔案疏

四月初八日

竊查粵匪於咸豐二年十一月竄擾楚北以來武漢
頻陷頻復復而又陷沿江州縣疊遭兵燹各衙門文

案冊籍多被焚燬難稽以致公事延宕弊竇叢生而糧道曠廢已四年蓋自咸豐二年成觀生任後其選授者均未莅任其閒二年分之漕業已徵收三年四年分亦有起徵者而應否蠲緩徵解必須分別澈底清查乃免不肖州縣以徵作緩將完作欠之弊通計湖北有漕州縣武昌府屬之江夏等十州縣漢陽府屬之漢陽等五州縣安陸府屬之潛江天門二縣德安府屬之安陸等五州縣黃州府屬則黃岡蘄水蘄州黃梅廣濟羅田荊州府屬則江陵公安松滋石首監利荊門州及所屬當陽縣凡三十五處咸豐二年

被擾失守者江夏漢陽蒲圻監利咸甯武昌黃岡蘄
水蘄州廣濟十州縣其時已在十一二月及正月初
又所擾不過城市未及四鄉情形尙不甚重三年被
擾失守者蘄州蘄水廣濟黃岡武昌漢陽江夏黃陂
孝感九州縣四年則擾及大冶通山通城崇陽沔陽
漢川鍾祥天門潛江京山安陸雲夢應城應山隨州
麻城黃梅公安石首監利荊門州於是有漕州縣無
不殘破或失而未據據而未久雖其閒輕重情形不
一而是年八月克復後其蠲緩徵解情形尙未清釐
就緒五年正二月武漢又陷惟江陵松滋當陽及有

漕折隨漕驢腳等款之襄陽鄖陽荊州宜昌各屬州縣則尙皆完善其歷年辦理情形均應分別趕緊清理所有武昌府屬之江夏等十州縣漢陽府屬之漢陽等五州縣安陸府屬之鍾祥等四縣德安府屬之安陸等五州縣黃州府屬之黃岡蘄水蘄州黃梅廣濟羅田麻城七州縣及各道府衛備文卷俱空應徵應解額數無可稽核應行咨部抄發檔案查照辦理現據署糧道張曜孫以各情稟報前來臣查事歷三年官非一任徵解蠲緩弊竇叢生亟應澈底清查除飭該署道先行親赴荆宜安襄各府所屬州縣督同

各該府檢核印券紅簿查訊經書詢訪鄉民逐節清查其武漢黃各府俟全省肅清再行查辦并飭荆襄二道宜荆襄鄖各府將歷年辦理漕糧全案卷宗檢送抄錄查辦暨咨戶部外相應仰懇 聖恩敕部

抄發檔案來楚以便遵照辦理所有湖北糧道歷年曠廢亟宜澈底清查情形並懇抄錄檔案來楚遵辦緣由理合恭摺具 奏再咸豐五年起徵漕糧各州縣應遵舊章將上游州縣派撥荊州駐防及綠營兵米節次嚴催趕緊兌運以敷兵食惟駐防兵米每年額發十餘萬石卽將已徵者儘數派撥亦不及十分

之一二其不敷之數甚多已飭司會同該署道另籌
辦理合併陳明

胡文忠公遺集卷八終